

夢醒時份

作者: 花生冰

Powered by [紙言](#)

第一章

「你係邊個？唔好走住，我係咪識得你？」

嘟嘟嘟~~~ 嘟嘟嘟嘟嘟~~~

「起身啦！鬧鐘都響左咁耐，你都仲唔起身！」

迷糊間被突然傳來嘅聲音叫醒，原來頭先發左一個夢。

起身梳洗過後，都仲有少少混混沌沌，已經唔太記得尋晚究竟發左個咩夢。

難得終於到左星期日，出去運動下嘆下新鮮嘅空氣。

係呢一刻嘅我，係完全估唔到會因為一個夢而令自己有幾咁沮喪。

「媽，我出去啦！你預我四，五點先返黎啦。」

「小心呀！唔好整傷自己返黎又要我幫你搽。。。」

咋擦！個油字都未講完，鐵閘已經關上。

「小伙子長大了 在世事難料的森林 尋覓理想事。。。」

聽著MP3，哼著熟悉嘅歌曲，仰望一下頭上嘅一片天空。

係香港生存嘅我地有幾何有時間會望上頭上嘅天空，更何況要談上理想事。

咄咄咄！！「睇路呀！過馬路都掛住望天，撞死你連耶穌都打救唔到你呀。」

估唔到一出街就俾人用耶穌問候，司機大哥點會用個救字咁文雅，好彩子華教識左我自己過濾返個音，聽落無咁傷。

「~~~逃過大人的攻勢 逃過類同的複製 逃過順從的洗禮」

邊行著邊聽著歌，入到地鐵站見到一式一樣嘅自己。帶著耳機，玩著電話，呢種就係時代潮流嘅洗禮。

唔好講理想，香港人又有幾多個可以跳出潮流嘅網綁同人冇我有嘅思想？

若果你敢跳出而家生活嘅框框，你就會被標籤成不切實際，任性放縱以及標旗立異。

「何以 當你不普遍 人家 先覺得此人煩或厭 傲慢與偏見 人性中 生出了弱點」

行出地鐵站，走到球場嘅一邊，放低肩膀上嘅重負。

終於可以拋開一切生活上所有嘅煩惱，盡情係球場上發洩。因為呢一刻，我只想

「讓我有個美滿旅程 讓我記著有多高興 讓我有勇氣去喊停 沒有結局也可即興 難堪的不想
只想痛快事情」

<續>

第二章

一日嘅運動量足以彌補一星期吸收嘅卡路里，又或者只係我自己太虧。

經過幾個鐘嘅運動，把全身肌肉耗至極點，今晚應該可以訓到個好覺。

「咦！原來前日係夢入面見到嘅係佢，點解佢今日著嘅衫同我係夢入面見到一模一樣嘅。」我自己喃喃自語。

「早晨呀，咁多位！」

「今日我地早餐食邊間好？而家已經好肚餓。」

「冰，你尋日又打完波呀？使唔使叫間早餐大份D 嘅俾你補下呀？嘻嘻！」

「沙，我個樣有無咁虧呀？」

另一位同事答道：「冰，你個樣唔係虧，只係好少見你一返黎就話肚餓要食早餐。平時都係沙問食咩先嘅。」

「係喎！搶左最為食嘅人講嘅野添，唔好意思呀！」

沙即刻谷起個鰓，悶哼一聲：「你先最為食，快d 叫啦，唔係一陣無時間你食呀！你今日有in-house，一陣怕你無力走，我地今日都好忙未必幫到你，你好食飽D 啦。」

「OK！放心，我做唔晒嘅野唔會留俾你，但食唔晒嘅話會留返俾你。哈哈！」

沙扁住咀叫：「邊個會得閒食你食剩嘅野，你留返自己OT 宵夜啦！再唔啖早餐，一陣黎到你都無時間食啦！」

果然，俾沙個咒罵咒中，真係要OT。沙執好自己嘅野臨走前行過黎。

做個好得戚嘅表情：「加油啦！雪櫃仲有份你啖左未食嘅午餐等你今晚做宵夜！我走先啦。」

個一刻我只可以苦笑地回應：「多謝！」

係佢離開我個位行去搭電梯嘅背影，我更加肯定前日個夢一定同佢有關。

因為佢走嘅姿勢同情景係一模一樣，只係夢入面個景象比較模糊。

但呢一刻嘅我根本無時間去諗其他野，要快手做完所有野，唔係連訓覺嘅機會都不是屬於我的。

幾經辛苦，終於做好晒手頭上嘅野，拎住自己盒飯返屋企。

係地鐵入面，我嘗試回憶到底前日個夢究竟係點，但好支離破碎，淨係記得沙離開嘅最後一個畫面。

我係度諗我究竟應唔應該同佢講我前日夢到佢，仲要夢到佢今日著嘅呢一套衫。

然後一首歌係我耳邊響起：

「才離開沒多久就開始 擔心今天的妳過得好不好 整個畫面是妳 想妳想的睡不著」

但願我並無呢種感覺。。。。

<續>

第三章

打開飯盒，已經變凍左嘅火腩飯，一邊食飯亦不忘聽住「扑得快」滾動嘅音樂。

「為何當 記憶碎掉 猶如歷盡滄桑及風雨」

我係度諗人好奇怪，點解我突然會對沙同個夢產生好奇，前日嘅夢同今日發生嘅事可能只係巧合。

俾著以前嘅我應該會好簡單咁抹走左呢段無必要嘅記憶瑣事，但今次卻好想走返入個夢去搵個究竟。

或者係我想從寂寞中找出一絲溫暖？定或係我心中有一些幻想，借今次個巧合幫自己找個藉口？

其實我自己亦唔係好清楚，不過呢種好矛盾嘅心情根本令自己訓唔著。

迷迷糊糊地好似又見到沙，今次佢唔係著尋日個套黑色西裝，而係簡單嘅白色襯衫同黑色長褲。

佢慢慢行近，走到我旁邊輕輕係我耳邊叫了一聲：「Lunch 就完啦，好起身洗個面做野啦。」

我先驚醒原來自己已經返左公司，但對自己訓著之前嘅事已經唔記得。

洗完面走去問沙：「我係咪訓左好耐？可能我尋日OT 太叻，我今朝係咪好神不守舍？」

沙笑著答：「今朝你一返黎就埋頭做野，連早餐都唔食。我地見你咁忙，lunch 幫你落返照舊嘅飯盒擺左係你旁邊，你都未食就伏低訓著左啦。不過我地明嘅，你尋日咁辛苦肯定休息唔夠，你而家好似精神返D 啦。」

「唔好意思呀，真係可能太叻，而家精神返啦，多謝你地！」我羞愧地回答。

我慢慢回憶返自己尋晚訓唔著，今朝一返黎就做埋尋晚D 手尾，做做下見到lunch time 到左就想抖陣點知一訓就訓左成個lunch。

就係差唔多放工嘅時候，經理行出黎同我地講，黎緊有幾個項目要你地兩個一組一組去拍住做，我已經幫你地分好組，黎緊呢幾個月你地都要多D 交流同有問題要提出，有咩問題就放工入黎搵我啦。

同事們不停係度討論究竟自己會同邊個一組，大家坐返去自己個電腦打開電郵。不知幸運定不幸，我同沙被編成一組。

不幸嘅意思係我要對住呢個女仔幾個月去做同一個project。雖然大家都識左一段時間，但始終互相交流嘅時間唔多，感覺總會有尷尬，尤其我自己本身慣左獨斷獨行，好少有拍擋一齊做野，就算有拍擋通常都係男仔。

幸運嘅係沙呢個女仔心地好好，好易相處，做野細心，爽快，整齊又有交帶。所以好多人都願意交俾佢做第二次覆核。

當我知道個分組之後行過去搵沙，問：「你會唔會好失望呀，要同我一組？」

沙錯愕地道：「吓！我以為你會唔想同我一組㗎，我做野都無你咁快。我同邊個一組都無問題。」

我笑著道：「咁以後多多指教啦！」沙回應：「多多指教！」

呢一秒鐘開始，我同沙嘅關係愈走愈埋，而我嘅心卻一直都不再安寧。

<續>

第四章

「艾彌沙！...」一個尖叫將我自己從夢中扎醒，原來又係夢入面見到沙。

雖然我同沙編入做同一個項目，但大家都各自係自己嘅工作枱到做自己野，真正嘅交流仍然好少。或者可能等到個項目正式啟動嘅時候，我地先會有更多嘅交流。

今日返到公司見到有時間睇下個項目嘅資料，然後走去搵沙同佢傾一下入面嘅工作。

「沙，你而家得唔得閒呀？我頭先望左下份job，有野想問下你。」

「冰，無問題呀，我尋日都已經睇左下大概有咩野。」沙笑住答。

我驚訝呆滯左一陣。

「嘩！咁快！我見到呢份job
要分開外國同香港兩份資料黎做，不如我做外國個部分，你做香港個部分？」

沙好奇地問：「外國個部分多過香港嗰，不如平分啦？」

「唔緊要嘅，都唔係差太多姐，如果有個人做兩邊嘅話唔小心撈亂左資料就麻煩，我怕我自己會咁。」我伸脰傻笑。

沙嫣然一笑：「咁又係，你有時都幾大懵，無問題呀。」

「車，我幾時大懵過呀，係一次有份job 唔記得提印度個邊交快D 俾你姐。」

沙半帶忿怒地：「你都記得呢！個次搞到我俾個客係咁催犒！總之，個次之後你就係大懵！超大懵！」

「OK！你贏啦，差你一餐飯啦。」

「咦！黎緊書展嗰，沙你有無興趣去行下？」

「都有呀，不過好多人會好迫嗰。」

「一係搵日唔使OT 嘅時候一齊去行下？」

「無問題，就下個禮拜啦，下個禮拜應該無咁忙。」

「OK！我買左飛就通知你。」

放左工，我whatsapp 沙：「沙，去書展個日你想食左飯先去定行完先食？我睇下使唔使留位。」

沙：「行完先食啦？早D 行無咁迫，同理行到累之後食野特別滿足架。」

我：「哈哈！咁行完先再睇食咩啦。」

沙：「:)」

仲有一個禮拜我就同沙第一次出去，我沒有興奮卻有不知所措嘅感覺。雖然唔係第一次約女仔，但對住呢個女仔嘅感覺總係莫名其妙怪怪地。

<續>

第五章

「無需要太多 只需要你一張溫柔面容 隨印象及時掠過 空氣中輕輕撫摸」

從第一晚夢見佢之後，間斷地係夢都會見到佢。而每日見到佢都總會帶點甜絲絲嘅感覺。是我跌進入戀愛嗎？

今日，我返工之前係7-11 買左兩張書展入場券，準備今日放工之後同沙一齊去。

「沙，今日放工之後去書展好嗎？」

「好呀！希望今日可以準時收工啦。」沙微笑地回應。

很不幸，今天嘅工作卻非常之繁瑣，七點我地都仲未走得。

突然，經理行出黎，今日大家都忙左好耐，快D 埋一埋尾有咩留返聽日先做啦。

我急忙收拾好枱上那十幾個文件夾，行去睇下沙有無野我可以幫手。

「沙，你有無野要我幫手呀，我個D 差唔多啦。」

「冰，差少少姐，但睇黎我地今日去唔到書展啦。我地又未買飛而家去實排好長隊。」沙無奈帶點失望。

我係襯衫口袋拎出兩張書展入場券：「我準備好左啦一早，如果你唔嫌夜同多人嘅話，我地今日都仲可以去。」

沙錯愕失神了一秒：「點解？你今朝已經買左啦？乜你都有咁細心嘅一面？」

停頓了一瞬間，空氣同呼吸聲係呢一剎那都像凝結僵化。

我在繼續等著，等待沙嘅回答。

沙含羞地繼續：「既然你都買左，咁梗係要去啦！等我執埋D 野之後一齊去啦。」

我開心地回應：「好呀，我係出面等你。」

我同沙並排著行，外面下著微微細雨。

「沙，你凍唔凍呀？」

「我OK呀。不如行快D，希望落雨唔好太多人啦。」

行到會展門口，好彩我地買左飛唔使再排隊買。主廳果然好擠擁，我拎起個地圖先同沙決定左有邊個攤位要行。

「沙，你有無書想買？」

「無特別，睇下有無咩吸引到先決定。你呢？」

「我有呀，不過我已經知係邊會搵到，我先同你行下其他攤位先再去買我嘅書。」

「好呀，你好似好熟D 書同書展嘅攤位啲！」沙好奇地開。

「我有時間都會借書或者上網睇，算係有少少認識咁啦。書展我通常係睇下有無咩特別新作品之類。」

「大多數一日係行唔晒成個書展咁多個攤位，所以只可以集中某D 攤位去逛。」

「一陣我見到有咩書覺得好就推薦俾你啦，睇下你啱唔啱。」

沙:「好呀！」

<續>

第六章

先行左最大幾個書商見到好多名人嘅作品，陶傑、森美、杜汶澤等。

我借機問沙：「你有無追偶像架，好似森美，杜汶澤呢D？」

沙：「無呀！我其實都好少睇書，睇書最多嘅時間就係讀書嘅時候。」

行過大眾，一堆堆愛情小說嘅作家，深雪、亦舒、張小嫻放晒係最著眼處。

「沙，女仔應該都好鍾意睇愛情小說，你有無睇開呢D？」

「無呀。愛情小說好多都好傷心，我聽講張小嫻每個故事都好悲傷。」

「如果講愛情小說嘅話，我會比較鍾意鄭梓靈。一陣我就係去買鄭梓靈本新作。」

沙對眼帶著好奇加意想不到地問：「你會睇愛情小說？咁唔似你個人嘅，你似係睇武俠，科幻個類嘅人啲。」

我笑著回答：「我中學都睇晒金庸，古龍，黃易同倪匡個D小說啦。後尾開始睇下唔同嘅愛情小說，發覺鄭梓靈個種簡單同清純比較適合我。」

我睇得出沙嘅眼睛仍然好好奇，究竟點解我呢種咁運動型嘅男仔會睇愛情小說。

「一陣我再話俾你聽點解鄭梓靈嘅書吸引到我啦。」我嘗試避開佢嘅繼續追問。

行過葉壹堂，見到本追風箏的孩子(The Kite Runner)。我介紹俾沙聽，呢本書係一個後悔嘅真人故事。

有時做人要微笑開心唔係一件容易嘅事，所以要好好珍惜能夠活著開心嘅日子。

沙聽完之後講得好似好深奧，但佢卻有好奇拎起本書翻了幾翻，然後問我：「係咪好睇架？」

「個故事係幾好，不過好多名字都係阿富汗文，當係一個故仔咁去睇就OK，個故事都有D悲可能會睇到你喊。」

沙帶點懷疑地道：「唔... 好啦，我試下睇下啦。不過咁多英文，我唔知要睇幾耐。哈哈！」

之後繼續行，行到花千樹嘅攤位。沙驚奇：「嘩！鄭梓靈原來出左咁多書，但好似無個邊個D咁出名，要行到咁入先見到嘅？」

我解釋道：「其實出唔出名我覺得唔重要，只要佢寫嘅野你睇得舒服，你有共鳴就得。一個作家可以好似明星咁樣吹捧嘅姐。」

「佢第一本令我印象深刻嘅書叫《流浪的旋轉木偶》，係講一個叫杰嘅男仔深愛著一個好鍾意冒險，唔會願意為佢停低嘅一個女仔。但杰唔介意，因為杰願意將自己一生嘅愛交俾呢個女仔。」

沙好奇地問：「真實邊會有咁傻嘅男仔？」

我斬釘截鐵地答：「呢個世界咩人都會有，但好多時當你遇到你唔會發現得到佢就係你身邊。就算俾你發現，你都未必會珍惜。」

沙肯定地道：「如果有咁好嘅男人，係女仔都會珍惜同願意留係佢身邊啦。」

我感嘆地道：「如果每樣野係咁肯定就好，可惜人會變。如果真係好似你咁講，我就唔會到而家都單身啦。」

沙慚愧地答：「唔好意思，又觸起你唔開心嘅回憶。係那個女仔唔識得珍惜你，你會遇到個珍惜你嘅。」

我轉開話題：「我不如借佢D

書俾你睇如果你有興趣的話，佢另外有本叫《無名字的你》係木偶嘅續集黎。今次我係黎買《蜂蜜色的眼睛》，我睇完覺得好借俾你啦。」

沙笑返：「好呀。多謝你！」

我地買完書行去其他嘅細廳，沙買入左D 文具之後我地就離開。唔經唔覺都已經九點了...

<續>

第七章

「沙，今日咁凍，我地去食熱鍋，好嗎？」

「好呀！」沙毫不猶豫地道。

我地走左去優食橫町嘅Colour Cafe & Bar，侍應安排我地到窗邊嘅位置。

陰暗嘅燈光同柔和嘅音樂，好耐未試過有咁浪漫嘅情調。

我介紹南瓜沙律同牛肉鍋俾沙，之後問：「你仲想要咩嘅話就叫啦，我知你而家好肚餓。」

沙回應：「加多個意粉我地share好嗎？」我笑著回答：「當然得，我相信你個食量，隨便叫。」

沙厲一厲我：「咁我決定要食窮你。」

我地落好晒野食之後，沙好奇問我：「你介唔介意講俾我聽你之前鍾意個女仔嘅故事呀？」

我無奈地慢慢將點識佢同點單戀佢嘅事講晒俾沙聽。

沙聽得入晒神：「其實你好好，我都好羨慕佢。有人願意做人肉鬧鐘同私人tutor，考試都唔溫書通宵寫筆記俾自己。不過你好傻好可愛，願意等佢七個鐘仲要知佢未必會出現。你將來實遇到個會珍惜你嘅女仔，唔好唔開心啦。」

我苦笑地道：「快d食啦！一陣d野食凍左就唔好食架啦。」

沙好奇地問：「你好似就快生日啦啫，有無諗住點慶祝呀？」

我驚奇地問：「你點知架？我唔同人講我幾時生日架啫。我都唔會慶祝嘅，對我黎講只係一個好平常嘅日子。」

沙得意忘形地：「我地同公司，每個人嘅生日都唔會係秘密啦！」

我答：「乜係咩？我無留意呢d野呀。我通常都唔太記得過左生日，有時屋企人提我先知。」

沙好奇地問：「你咁怪嘅，生日都唔理唔去慶祝。生日應該要開開心心慶祝架嘛。今年我同你慶祝啦！」

我不知所措：「吓！？唔駛咁客氣啦。我唔太慣慶祝自己生日，我通常都係幫人慶祝多。」

沙唔俾我拒絕：「唔理你咩藉口，你生日個日放工要等埋我先好走。」

我只好點頭：「無問題。先多謝你啦！咁呢餐我更加要請你啦，陪我食又陪我行書展，黎緊又陪我食飯。」

沙嫣紅了面：「哈哈！唔駛客氣，我都多謝你。」

我地過嘅第一日約會，亦鋪排好了第二次嘅約會。心多了份溫暖，多了份開始萌芽嘅愛。

<續>

第八章

「般恩冰，你今日唔好走咁快呀！」沙係佢個位到大叫出黎。

我呆一呆，心裡暗忖：「我今日好似無得罪佢啫！我係咪有咩野未俾佢定做咩要大嗌我全朵呢？」

我偷望沙一下，佢仲係佢個位到做緊野，我望向我最近嘅一位同事，對佢做個口型問：「知唔知咩事？」佢亦只攤開兩手唔清楚。

我只好慢慢收拾自己嘅工作然後靜候一陣沙搵我嘅事。

不消一會，沙走過黎問：「你行得未呀。」我錯愕地望一望佢：「我今日約左你咩？」

沙扁咀啤住我：「唔好扮野！今日係七月嘅邊一日？」

我望一望枱上嘅日曆，就係準備答嘅時候：「啊！乜原來係今日呀！唔好意思，真係唔記得左添。不過，今日應該係我話事啫。」

沙拉住我：「得！食咩你話事，但其他我話事。」

我就咁俾佢扯住走。

我地都係落左銅鑼灣，去左千兩。

我：「我揀好左食咩啦。叫個南鱈吞拿兩食，其他個D你揀啦。」

沙歡喜地話：「好呀！」

我傻傻地問：「你之前唔係讀男女校咩？點解你到而家仲未拍拖？」

沙示意要我等佢食埋舊刺身先答我，見到佢食到谷起塊面個樣好可愛。

沙答道：「好多男仔都好衰，而且我鍾意同我D女仔朋友一齊，又想專心讀書，所以無拍拖呀。」

我好奇地問：「無人追你咩？」

沙笑著答：「有呀！不過無興趣囉！」

我唔敢再追問落去，然後我地傾左下關於工作上面嘅野。

到上左藍鱈龍船嘅時候，沙主動叫侍應幫我地合照。

沙對住我講：「呢張相證明左有人陪你過同慶祝生日！唔好成日咁自閉唔理自己，淨係諗人地！」

個一刻，我好感動，但我只微微點頭，並無回應一句說話。

到食完走個時，我同沙講：「多謝你呀！你生日我陪返你啦。我知你鍾意睇蝙蝠俠，好快就上畫，你有無興趣同我一齊睇呀？」

沙考慮左一陣：「如果你記得我生日嘅話無問題呀。睇戲..
umm... 放工去睇再食飯會好夜，一係等到星期六、日先去啦。」

我個心跳得好快：「好呀！你邊日得閒我就去買飛啦。」

就由睇蝙蝠俠開始，我同沙就愈走愈近，就只差一句情侶肯定嘅說話。

係睇第一齣戲嘅一日，因為沙有野做未食飯就返屋企換衫再出黎銅鑼灣JP，我唯有暗地裡買定雞蛋仔同格仔餅俾佢入戲院睇。

係睇戲期間，沙依偎落我肩膀，我隻手卻唔敢搭著佢。

到完戲走個時，沙同我講：「你真係好傻好蠢呀，你隻手肯定好劫啦！多謝你嘅細心，雖然D雞蛋仔淋左，但我都感到你份細心。」

我口窒窒地回應：「你開心就得啦。我係比較遲鈍，希望你唔好計較。」

「唔知你願唔願意同我一齊呢？」

<續>

第九章

「你真係願意同我一齊？」沙帶點疑惑地問。

「係呀！如果你唔介意我呢個傻仔嘅話，我想你同我一齊。」我好誠懇地道。

「噃！你其實根本唔傻，你好叻。多謝你呀！」沙甜甜地笑著講。

然後我伸出隻手去捉緊佢嘅手，一對好冰冷嘅手。

「你對手咁凍嘅？你係咪好凍呀？」我擔心地問。

「我對手不黠都係咁凍，不過你對手咁大咁溫暖我對手而家根本感覺唔到凍。」沙係我耳邊細細聲道。

甜蜜幸福開始圍繞著我們。但可以維持幾耐？

我地第一個嘅聖誕節，我設計左一連串驚喜。

由於沙嘅生日同聖誕節好接近，第一個佢嘅生日我為佢設計左一張生日卡。封面有佢最鍾意嘅麵包超人蛋糕，入面有我對佢嘅承諾：「我願為你擔一生的傘，借一世肩膀俾你依偎。」

食完聖誕餐，我地去到維園一個角落。我準備左一系列啤牌魔術送上一個承諾，從魔術變左一隻銀紙戒指。

「沙，我想有一日可以為你戴上真戒指，呢一隻當係我先俾你嘅承諾。只要你唔離開我，我都會一齊係你身邊。」

「呢一套魔術，其實我仲未諗到叫咩名，因為我都係上個禮拜先完成好個編排，希望你鍾意啦。」

沙感動地喊：「好多謝你為我做嘅一切，我願意留係你身邊一生一世。」

自此以後每一年嘅情人節，我都為沙送上一對銀紙戒指。

每一個周末，沙都會同我食飯睇戲，有時陪佢行下街。有日，我地經過冒險樂園見到公仔機有麵包超人公仔，沙好想要但又知道自己唔識夾。

我考慮左一陣：「俾一個禮拜我，我會送呢隻公仔俾你啦。」

沙急著道：「唔好晒錢啦，佢成日都會換款。」

我輕拍拍佢個頭：「幾多款都唔係問題，俾少少時間我就得。」

然後嘅一個禮拜，我從Youtube一直研究夾公仔同扔彩虹嘅技術。當大概領會就自己去試下夢幻樂園同冒險樂園嘅各款公仔機同彩虹。

就係咁，每一個禮拜嘅周末，我地又多左地方去，就係去唔同冒險樂園、夢幻樂園分店搵麵包超人公仔同埋得意嘅企鵝公仔。

每一次贏到大公仔，沙嘅房間就變得更少嘅位置。沙撒嬌地道：「你呀！俾左咁多公仔我，如果有日你唔再夾同贏俾我咁點算㗎！」

我溫柔地親一親佢額：「只要你鍾意，我一定會一直夾俾你。直到你唔要為止。」

沙嘅父母好安心將沙交俾我照顧。經常叫沙多D 陪我，去我屋企食飯。

好溫馨，好幸福，亦充滿著甜蜜的愛。

將要踏入第三年...

<續>

第十章

我同沙愈發展愈穩定，我經常邀請佢去我屋企食飯，我自己親自下廚。

沙不時會問：「你會介意我煮野食無你咁叻嗎？」我都一貫地答：「唔會，我煮咪得囉。」

係我生日那一天，沙嘗試自己去買餸煮俾我食。由六點開始，我係廚房外見到佢嘅手忙腳亂，但佢又唔俾我入去幫手，真係有少少心痛。

直到九點先完成那雜菜，蕃茄炒蛋。但那一刻，味道已經唔再重要，那一份付出足以令我感動到要擁抱著沙。

「沙，你好傻呀！你有無整親呀？以後唔使再咁辛苦特登煮俾我食啦，我負責做煮飯嘅一個就得。」

「我今次煮先知平時你會有幾辛苦，你仲要煲湯添。冰，對唔住，我唔會係一個好老婆。」

我係懷中輕吻她的面頰：「好老婆唔一定煮野叻嘅。你安心做個小公主啦。」

沙為左彌補煮唔到一餐好味嘅生日餐，佢去搵人教佢整生日蛋糕，好勤力去織頸巾。我心中暗想：「能得此女友，人生仲有何求嗎？」但願佢一直能留守係我身邊已足夠。

呢一年嘅聖誕，我地去澳門旅遊。我每次去澳門都一定會去沙利文或者九如坊食那一個彷彿雪糕嘅木糠蛋糕。今次亦不例外。

「沙，我帶你去食一樣我每次都必食嘅甜品。你一定會永遠都記得呢一個味道。」

「係咪咁好食架！唔好食我唔放過你架。」

「佢係一層一層好得意，而且食落唔似蛋糕咁。」

「好好味呀！我地以後每次黎都一定要再食！」

的確，之後有兩三次再黎，我地都係會黎呢兩間餐廳到再嚐這一試難忘嘅甜品。

「冰，帶我入賭場睇下好嗎？我未試過入去。」沙懇求地問。

「好啦，俾幾百蚊你玩下，玩晒就走。」我不能拒絕地道。

「我淨係識玩老虎機，因為只係就咁禁個製。」

果然，沙用左幾十蚊落去部老虎機到。個一刻，佢自己都有D心痛。

「都唔好玩嘅，D錢入左去唔識出返黎。」沙用佢一副純真嘅口吻講出黎真係好可愛。

「好啦，為左你我先講一講俾你聽，D人黎賭場玩咩。」我帶沙行離老虎機位置。

慢慢介紹輪盤，百家樂，廿一點，牌九，大細等每種賭法。

經過大細嘅枱時，沙興奮地：「呢個我識，就咁揀大細！」

我大概講一講除左大細，仲有開出嘅點數，組合嘅玩法。「沙，為左你我玩幾鋪俾你睇下啦。呢兩百蚊用晒就走啦。」

先後分別押大，細同總點數。幸運地贏左幾鋪之後就同沙講：「呢度都夠我地酒店住宿費啦，你而家知點解D人會坐係度成日都唔走啦。」

沙好興奮：「冰，你咁叻嘅！咁樣買幾次唔同嘅野就贏左成千蚊返黎。不過賭呢樣野都真係唔啱我地。」

沙一邊行一邊捉實我，然後細聲到剛好到我耳邊：「好開心有個咁叻嘅你係我身邊。」

「冰，你以後只可以對我一個咁好。」

<續>

第十一章

長洲 -- 「冰，好大個平安包呀，好得意。」

馬灣 -- 「冰，草地上呢個日期係我地嘅紀念日子。」

赤柱 -- 「冰，好多謝有你陪我行沙灘。」

南丫島 -- 「冰，呢個豆腐花好滑呀。」

大澳 -- 「冰，炭燒雞蛋仔好好味。」

「今年我地去邊好呀？」

「不如去台灣啦？」

「好野！有得同冰你坐飛機。」

「不如兩日係台北，兩日去浸溫泉，好嗎？」

「好呀好呀！同你一齊做咩都好開心。」沙又再俟係我身邊。

鼎泰豐，度小月，師大夜市。每一個地方都好溫暖好幸福，係因為身邊有著一個帶俾我溫暖幸福嘅沙。

這一天，外面下著雨，但我地仍然去左十分之路，走上那條放天燈嘅舊火車軌道。

沙好專心地係個天燈寫上佢每一個心願。

「冰，你過黎一齊寫啦。」沙嚷著拎著雨傘嘅我。

「唔啦。我寫字唔好睇，你幫我寫埋啦。」

沙寫滿好多約定以及關於我地兩個嘅願望，然後我地一齊點燈放上暫時為我地停左落雨嘅天空。

呢一日，唔知點解我好劫，可能走左一條好長嘅路，好少出聲，好想合上雙眼休息。

「冰，你係咪唔開心呀？唔好意思呀，要你今日陪我一直行咁耐。」沙帶著歉意道。

「無呀！係有D 劫姐。我地快D 返去食飯先啦。」

呢一刻，我地大家意識到沙鍾意去唔同景點去睇，無論幾遠幾早要行幾多路都要去晒咁多景點；至於我想旅遊放假休息下，工作每一日已經好忙碌，假期唔想都有密密滿佈嘅行程。

不過，我唔會埋怨，總之沙想做嘅野我都會盡量配合。

而且，行埋今日，我地聽日就會去淡水享受溫泉，唔會再有太多景點要行。真正享受假期嘅休息。

回到八方美學商旅，因為每日都會有兩杯飲品送俾住客，所以返到去我地兩個都係酒吧旁坐低叫兩杯飲品。

每晚大堂都會有活動，而今晚就係社交舞班，看見一班上左年紀嘅叔叔阿姨係度跳舞，好輕鬆好開心。

「冰，如果我地將來都可以好似佢地咁就好。工作忙碌完享受二人世界，簡簡單單咁過幾幸福。」

「我都想，如果做得晒工作嘅話。台灣嘅生活比香港輕鬆好多。」

望著一對對老情侶，我地心裡都充滿羨慕同妒忌嘅心情。

我同沙會有這樣嘅一日嗎？

<續>